

Mehr seind in disem Quadranten etliche gebogne Linien/ nit gerad/ auch nit nach dem Circel gemacht/ vnd bedeuten die gemeine stunden/ wie auß den ziffern derselben/ so dabey steht/ als 1. 2. 3. 4. zusehen.

Durch erst gemelte Stundlinien gehn andere/ also gestaltet: ----- das seind der Planeten Stundlinien/ mit grossen oder Lateinischen ziffern gezeichnet/ als I. II. III. biß auff XII. welche Planetenstund iren anfang haben von auffgang der Sonnen/ biß zum Nidergang/ vnd hat der Tag allzeit 12. Stund/ er sey gleich lang oder kurz: aber nicht also/ daß alle Stund des Tags (wie etliche meinen) gleich weren/ sonder sein vndereinander vngleich.

Auß dem Centro A. gehn 6. Linien nach dem Circel gemacht/ die bedeuten der Judenstund/ dabey die zahl der stunden von 1. biß auff 12. zusehen. Dise stunden werden auch von auffgang der Sonnen biß zum Nidergang gezelt/ vnd seind alle sampt einander gleich: vnd jedes Tags/ er sey kurz oder lang/ zwelf: wie dann auch die Nacht inn 12. Stund von nidergang biß zum auffgang der Sonnen abgetheilt wirt: darauß dann der vnderscheid der Planeten vnd Judenstunden verstanden wirt/ weil dise des Tags vnd Nachts einander gleich/ der Planetenstunden aber einander vngleich.

Neben den Linien der zwölff gemeinen Stunden seind etliche Stern mit ziffern bezeichnet zusehen/ von 1. biß auff 27. auch seind dise Stern zu fünferley arten gestalt/ damit sie der größe halber zu vnderscheiden/ ob sie der ersten/ andern oder dritten/ 2. Grösse/ also gar deutlich zuverstehn seyen: vnd auß beygesetzter Tafel sollen die Namen der Stern durch ire numeros oder zahlen erkandt werden.

B ij

Na=